

Tolas ni San Pablo Dira do Taga-Efeso

Introduction

No TOLAS NI SAN PABLO DIRA DO TAGA-EFESO am ipapanmo na o plano no Dios a mapanayahbo so atavo a inamaog do tohos kan do tana aya do othoridad ni Cristo. Asa pa ya ka imbitasion do atavo a kamanganakan no Dios do kawnot da do kaparin no viay a nia so maimportante a parte no kaparin no atavo a maychakasa do panayahboan ni Cristo.

Malir ta dia o parinyen no Dios Ama a mapaychakasa sira so pinidi na a tawotawo na do kapakabo do gatogatos da as kalibri da do gatogatos da a makayamot di Jesu Cristo. Makatongtong o promisa saya no Dios do ayet no Masanto a Espirito.

No dayay no tolas aya am no kaparin no viay a mayanong do asa ka Cristiano tapian makatongtong o somnivog a kapaychakasa di Jesu Cristo. Matatarek o pinalitratoan so kapaychakasa taya di Jesu Cristo a iya so soyid no saray ta. Niaya sa o pakakman aya sia: (1) no timban o karakohan as si Cristo o oho; (2) no timban o vahay as si Cristo o soyid na; (3) no timban o kakovot a mavakes as si Cristo o kakovot a mahakay.

Malir pa dia o mensahe no makakniknin aya a grasia no Dios di Cristo. No grasia aya am sakopen na o addaw ni Cristo, no sakrifisio na, no kapakabo na kano kanamonamoan na.

Outline

Introduction 1:1-2

Si Cristo kano timban na 1:3-3:21

No vayo a viay di Cristo 4:1-6:20

Conclusion 6:21-24

¹ Si Pablo ako a apostol ni Jesu Cristo a makayamot do inolay no Dios a tayto a maytolas dinio a tawotawo na a tayto a mavidin a omonot di Jesu Cristo.

² Bendisionan kamo pa no Dios Ama kano Apo taya a si Jesu Cristo as kapakarawat nio pa so grasia kano kaydamnayan no aktokto.

No makakniknin a parawaten diaten no Dios a makayamot di Cristo

(1 Corinto 1:4-9; 1 Pedro 1:20-21)

³ Pamahmahsan ta kano dadayen ta o Dios as Ama no Apo taya a si Jesu Cristo a iya so tomnoroh diaten so atavo a sidong kano kasisien a yapo do hanyit a makayamot di Cristo.

⁴ Makayamot pa di Cristo am pinidi na yaten no Dios a manam kano nakamaog so mondo aya tapian manamonamo ta a abo so kaparoparoan do salapan na,

⁵ as katongdo na diaten a mayvadiw a kaman-ganakan na a makayamot do addaw na a nia so adan na a plano a pinatongtong na di Jesu Cristo,

⁶ tapian dadayen o Dios do rakoh aya a grasia na niaten do nakatovoy na sia do tana aya o ichaddaw naya a Manganak,

⁷ a iya so minadidi diaten no raya na as kapakabo na diaten do rakoh a grasia na

⁸ a niaya so di na nibayoan a parawaten diaten,

⁹ as katayto na tomoroh diaten so kasolivan kano kapanmoan ta sia tapian mapanmo ta o plano naya a mian di Cristo

¹⁰ a niaya so kapaychakasa na anti so atavo a mian do hanyit kano atavo a mian do tana do tinongdo na a tiempo as kaiya no mamanito.

¹¹⁻¹² Makayamot pa di Cristo a akma so mian do plano no Dios am yaten a nanma a omnipanapanaya sia am pinidi kano tinodin na yaten tapian dadayen kano pamatohen ta o ngaran na a iya so mapatongtong so atavo a mian do inolay na.

¹³ As makayamot pa di Cristo am inio a nakadngey so kakawayoran aya a Evangelio a nia so nanawo no kalibrian as tayto dana a nanganohed sia am narawat nio o Masanto a Espirito a akma so nipromisa no Dios,

¹⁴ a nia so ichasigorado no karawat ta so nipromisa na sa a itoroh diaten tapian dadayen kano pamatohen o ngaran na.

*No dasal ni Pablo dira do taga-Efeso
(Colosas 1:19; 2:9)*

¹⁵ Dawa nakayapo do nakadngey ko sia o komapet do saray nioaya no Apo ta a si Jesus kano addaw nioaya nira no atavo a tawotawo no Dios,

¹⁶ am nibhebhes ko pavaynio a pamahmahsan do Dios as kafermi ko a makanakem dinio do kapachahoahok ko,

¹⁷ tapian no makapamarin aya a Dios a iya so Ama no Apo ta a si Jesu Cristo am torohan naynio so kasolivan kano maypaypangay a kapanmoan nio so komapet sia,

18 as kapasehdang na pa sia o aktokto nio tapian mapanmo nio an ango tayto nioaya a panapanayahen a tinawatawagan naya dinio as kano karakorakoh no balor no makakniknin saya a nipromisa na a parawaten diaten a tawotawo na,

19 as kano an ango di aya machipanda a ipakapamarin a maytrabaho diaten a manganohed

20 a nia so pinavoya na do nakapayvangon na si Cristo as kapamato na sia do kawananan na sia do hanyit

21 a mamanito kano atavo a ipakapamarin, anohed, anongen as kano ngaran a dia voyvoh sichangoriaw as do manam pa a tiempo a abo so pandan;

22 as pinarin na pa no Dios o atavo a mian do panayahboan no ipakapamarin ni Cristo a iya so oho no atavo a nanganohed sia a abnekan so timban na,

23 a nia so karakohan na a iya pa so maynolay kano pakayapoan no atavo.

2

No litarato no vayo aya viay ta a makayamot di Cristo

1 Do nakarahan a tiempo am arava o viay nio a abo so pandan a makayamot do gatogatos nio.

2 Inonotan nio kanaw o marahet a pariparinyen no tawotawo a di pa nakasinched so Dios as mian kamo do panayahboan ni Satanas a iya so apohen da no demonio kano maypatol dira do tawotawo a machisobna do Dios.

³ As akma ta sira ya do nakarahan a minonot do marahet a ichakey no karakohan kano aktokto as dawa somnivog ta a mayanong a kakastigoan a akma sira.

⁴ Pero no Dios a oyod a rakoh so kasisien as kano makayamot do rakoh a addaw na niaten,

⁵ am aran akma sawri o kaparin ta a makayamot do gatogatos ta am tinorohan na yaten so vayo a viay a makayamot do nakapirwa na maviay ni Cristo. Nilibri na yaten a makayamot do grasia na.

⁶ As makayamot do nakapachasa ta di Jesu Cristo a tinorohan so viay am pinachangay na yaten no Dios di Jesus a maypatol do hanyit,

⁷ tapian ipavoya na do manam a tiempo o di aya machipanda a grasia na niaten a makayamot di Jesu Cristo.

⁸ Makayamot do grasia no Dios o nilibri na dinio do nakasaray nio ni Jesus. Niaya am yapo ava do tinanitanyan nio, ta tinoroh dinio no Dios a libri.

⁹ Makayamot ava ya do mapia a pinariparin, ta tarek a mian o mapakamato so karakohan na.

¹⁰ Tinorohan na yaten so vayo a kaparin no viay a makayamot di Jesu Cristo tapian chitahen ta na sichangoriaw a parinyen o sivog a ichahoho na diaten no Dios.

*No kapakarawat ta so malit a anohed do Dios
a makayamot di Jesus*

¹¹ Makayamot do akma saw a adan a kaparin no viay nio, inio a Hentil as di pavidangen a makasinched so Dios,

¹² am naknakmen nio ta marayi kamo kanaw di Cristo as estranghero kamo dira do tawotawo sa no Israel as kadi nio a machangayan do promisa sa no Dios as kabo no panapanayahen nio a kalibrian.

¹³ Pero makayamot di Jesu Cristo am inio a adan a marayi do Dios am pinasngen kamo a makayamot do raya ni Cristo,

¹⁴ takwan iya o napaychakasa diaten do naka-pakaro na so pakayapoan aya no kadi ta may-chakasan,

¹⁵ ta do nakadiman na am pinatongtong na o onoonotan sa a nia so pakayapoan no di maychakasan no Judeo kano Hentil,

¹⁶ as malit ta na a pinayvidi na do Dios as kapayvadiw na diaten a maychakasa do naka-pabhes na so paysosobnan taya.

¹⁷ Ta iya o nawara a makaparin dinio a mayvidi do Dios, inio a Hentil a adan a di makasinched sia as kaninio pa a tawotawo no Israel.

¹⁸ As makayamot pa di Cristo am magsal ta atavo do salapan no Dios Ama do sidong no Espirito.

¹⁹ Dawa ara kamo pava estranghero, ta tayto kamo na a tawotawo no Dios as membro no familia naya

²⁰ a niaya so pinatnek do nanawo da no apostoles kano profeta sira as si Jesu Cristo o mismo a soyid na,

²¹ as iya pa o maynolay diaten tapian may-vadiw ta a manamonamo a yanan no Apo taya.

22 As si Jesu Cristo a makayamot do Espirito o tayto ta pachichasan a yanan no Dios.

3

*No ministerio ni Pablo dira do Hentil
(Colosas 1:24-29)*

1 Dawa makayamot dia am mavidin koynio a ipachahoahok aran akma sawri o katayto ko a makalaboso a makayamot do kapayserbi ko di Jesu Cristo a nia so ichapia nio.

2 As do ahahawen ko am ari nio na mapanmo o nakapainkargado na nia no Dios diaken o trabaho aya a kapawnnonong so grasia naya dinio,

3 a niaya so pinapanmo na diaken akma so tayto ko a ipapanmo dinio do maynyed aya a tolas ko

4 a dia pa so kapanmoan nio sia o kaintindian ko so nanawo aya a komapet di Cristo,

5 a nia so dia pinapanmo dira do nanma a tawo amna tayto dana pinapanmo no Espirito dira do apostoles kanira no profeta.

6 Niaya o nanawo no kapaychakasa no Israelita kano Hentil a makarisibi so nipromisa sa no Dios a makayamot di Jesu Cristo do nakadngey da so Evanghelio aya.

7 Makayamot do ipakapamarin no Dios am tinorohan na yaken so rakoh a privilihi a pachirawatan na a makayamot do grasia na a mapawnnonong so Evanghelio aya.

8 Aran akma sawri o kayan da no mapipia kaniaken a tawotawo na am pinarawat na diaken

o anohed a mapawnonong sia dira do Hentil o di aya machipanda a sidong kano kasisien ni Cristo,

⁹ as kapavoya ko nia do atavo a tawo o plano aya no Nangamaog a Dios a dia pinapanmo do nakarahan a tiempo,

¹⁰ tapian no makakniknin aya a kasolivan no Dios a mavoya dira do nanganohed* am sincharan darana sichangoriaw no mian so ipakapamarin do tohos,

¹¹ akma so adan na a plano a pinatongtong na di Jesu Cristo a Apo ta

¹² a iya so yanan no anohed kano agsal ta do salapan no Dios a makayamot do saray ta nia.

¹³ Dawa do kayan no pandidiwan ko a makayamot dinio am akdawen ko o kadi nio a dispresioan.

No addaw ni Cristo

¹⁴ Dawa makayamot do makakniknin aya a plano no kalibrian am ipachahoahok ko do mato a Dios

¹⁵ a iya so Ama no atavo a nanganohed a mian do tana aya kan do hanyit,

¹⁶ o kapaypahni na so saray nio kano kapay-pangdet na dinio do makakniknin a sidong no Espirito na,

¹⁷ as ka si Cristo a iya so ichasaray nio o maynolay do viay nio do kararaw tapian do kayan no rakoh a kaintindian nio so addaw na

¹⁸⁻¹⁹ am mapanmo nio kanira no atavo a manganohed di Cristo o karakorakoh no

* **3:10 3:10 Do Griego:** timban.

makakniknnin aya a addaw[†] ni Cristo a nia so dia parin a matodah no pangtoktoan no tawo, as kapakarisibi nio so maypaypangay a kasolivan kano sidong no Dios a nia so ichatodah nio so kakeyan na ninio.

²⁰ Dawa dadayen o Dios a iya so makaparin so manghavas pa kano iyahes ta sia anmana ichayiktokta ta a makayamot do ipakapamarin naya do viay ta.

²¹ Dadayen kano pamatohen sia no atavo a nanganohed sia[‡] a makayamot di Jesu Cristo. Dadayen sia a abo so pandan! Amen.

4

No kapaychakasa ta a makayamot do Espirito no Dios

(Colosas 3:12-15)

¹ Dawa yaken a asa ka priso a makayamot do Apo taya am tayto ko a akdawen dinio o kachitachita nio so kapakakma nio so kaparin no viay a kakeyan ninio no Dios do nakatawag na dinio.

² Mapakamahbo kamo as kapakatanoy nio. Makarakoh kamo so pasinsia do kadwan dinio, as an mian o machisada dinio am pakaboan nio a makayamot do kaddaw nio no kadwan dinio.

³ As kafermi nio omchitachita so kapakasa nio do aktokto a makayamot do karadinepan aya a tinoroh no Espirito dinio,

[†] **3:18-19 3:18-19 Do Griego:** no kawvovong, katohotohos kano kararahem no addaw. [‡] **3:21 3:21 Do Griego:** timban.

4 takwan masa ta di Jesu Cristo a akmay asa a ka karakohan. Asa o Espirito aya a mian diaten as malit pa o tayo taya a panapanayahen a nia so resolta no nakatawag na diaten no Dios.

5 Asa o Apo ta kano panganohdan ta as kano malit o pakayapoan no kapabawtismo ta.

6 Asa o Dios a Ama ta atavo as iya o mato do atavo as maynolay diaten atavo kano machasa diaten.

7 Pero matatarek o kasolivan a tinoroh ni Cristo do maypongded diaten a ichaparin ta so mayserbi do Dios.

8 Akma so nakatolas do Chirin no Dios,
“Do nakapayvidi na do hanyit am nihomis na sa o kalaban na sa as katoroh na so matatarek a kasolivan.”

9 No ichakey na vatahen no, “Nayvidi sia do hanyit,” am no nakangay na pa do irahem no tana aya.

10 No gomintin aya am iya pa o tomnohos aya tapian mavoya o ipakapamarin na do atavo.

11 As no tinoroh naya am apostoles kano profeta sira. Mian pa sa o evanghelista, pastor kano maistros

12 a nia sira so mapaynananawo sira so tawotawo sa no Dios tapian mayserbi sa dia as kapaychakasa da a mapaypahni so saray no kadwan dira di Cristo*

13 a manda do katodah ta so kakeyan na niaten a maychakasa do anohdan kano kasincharan so Manganak aya no Dios a diabdibdis so saray,

* **4:12 4:12 Do Griego:** no karakohan aya ni Cristo a no timban aya.

¹⁴ tapian di ta na akmay kametdehan a masong a mabdis so aktokto kano lokohen no masosolib saya a mangononong so ipaychawawa da,

¹⁵ as do addaw am pavatahen ta o kakawyoran a nia so kavoyan so kawnot ta do kaparin no viay a ichakey ni Cristo a abnekan aya so oho,

¹⁶ a iya so paychakasan ta atavo a abnekan aya so karakohan na a mayponged a mapatongtong so anongan a tinoroh na diaten a nia so pakayapoan no ipaytetnek ta so mahni do addaw.

*No vayo a viay no omonot dana di Cristo
(Colosas 1:21; 3:5-9,12-15)*

¹⁷ Do ngaran no Apo taya am tayto ko a vatahen dinio o kadi nio makakman so kaparin no viay da no di aya makasinched so Dios, ta matarek o ichakey da do viay da.

¹⁸ Mavota sa do kakawyoran as kapachisobna no viay da do kakeyan nira no Dios do kaskeh da a manganohed.

¹⁹ Ara pava o asnek da as pasivosivogen darana o kapamarin da so marahet. Ara pava o omsaloval sira a mamarin so malalapos a pariparinyen.

²⁰ Niaya ava o ninanawan dinio a komapet di Cristo,

²¹ ta nadngey nio na o ninanawo namen dinio as ari kamo na omonot do kakawyoran aya a mian di Jesus.

²² Dawa karoan nio na o adan nio a dadakay. Tadichokoran nio o adan a kaparin no viay a nia so omonot do pakamian so karakohan.

23 Payavayohen nio na o pangtoktoan nio

24 as kapatadi nio sia o manamonamo kano mapia a kaparin no viay a tinoroh dinio no Dios.

25 Dawa pabohen nio na o kapaydaday nio as no kakawayoran o vatahen nio do kadwan dinio, takwan maychakasa ta na a membro no karakohan aya ni Cristo.

26 An somoli kamo am tiban nio o kadi nio makagatosan as kawayakan nio manam kano kasdep no araw

27 tapian abo o oportunidad ni Satanas a mapakagatos dinio.

28 Omhes dana manakanakaw o adan a manakanakaw as no kapaytrabaho na tapian mian o iviay na so karakohan na as kaparin na pa so makasidong sira so maykaylangan.

29 Maychirin kamoava so di mayanong an dia voken a no ichapia awri as kano tomoroh so sidong dira do manngey.

30 Angsahen nioava o Masanto a Espirito no Dios a iya so mian dinio a ichasigorado no kalibrian nio.

31 Pakarohen nio na o kapaninyen, lotod, soli, kapaydidiman, kapamarahet so kadwan kano kaynahanhet.

32 Makarakoh kamo so kasisien kano sidong do kadwan dinio as kasonong no kapakabo nio a akma so nakapakabo dinio no Dios a makayamot di Cristo.

5

*No kaparin no viay no mian do kasehdangan
(Colosas 3:16-17; 4:5-6)*

¹ Makayamot ta kamanganakan kamo na no Dios a oyod na a ichaddaw am chitachitahen nio o kakma nio so kaparin no viay a kakeyan na ninio.

² Makarakoh kamo so addaw a akma so nakad-daw niaten ni Cristo do nakatoroh na nia o viay na a makayamot diaten a nia so oyod a pinakamia no Dios.

³ Mayanong ava o kayan no aran ang a malalapos a pariparinyen a mavahey dinio, aran no kaktokto nio pa sia, as kabu no kapayagom nio, ta tawotawo kamo na no Dios.

⁴ As tiban nio o kabu no vatavatahen nio a malalapos as kadi nio mayistorian so abo so simmo kano makasnek a nia so di mayanong do kamanganakan no Dios an dia voken a no kapamahemahes do Dios o pavatahen nio.

⁵ Mapanmo nio ta arava o panapanayahen na do paypatolan ni Cristo kano Dios Ama no tawo a malapos so dadakay kano pangtoktoan kano mayagom, takwan no ichalakam na saya a dira am nia o payserbian na as no Dios ava.

⁶ Onotan nio sava o manloko saya a makavata sia o kabu no rahet no akma saya sia a parinyen, ta niaya sa mismo o pakayapoan no soli no Dios kano kastigo na dira do dia manganoched sia.

⁷ Dawa pachivawan nio sa o akma saya sia a tawo.

⁸ Do nakarahan am mian kamo do kasaris-arian, pero tayto kamo na a machassa do Apo taya a si Jesu Cristo do kasehdangan. Dawa chitachitahen nio o kaparin aya no viay a mian do kasehdangan,

⁹ takwan no akmaya sia a kaparin no viay am

mapia kano mayanong as kano kakawayoran o onotan na.

¹⁰ Kapanmohen nio an ango ipakamia no Apo taya a niaya so parinyen nio.

¹¹ Pachivawan nio o pariparinyen da saya no mian pa do kasarisarian, ta niaya mismo o mapavoya nia dira o karahet na.

¹² Aran no kavata sia so itayotayo da saya a parinyen am oyod a makasnek.

¹³ Ta an do kavoya da so kaparin no viay do kasehdangan kano kapanmo da so katayto da do kasarisarian as nawri pa o ibhes da a omparin sira so adan da paparinyen.

¹⁴ Dawa mian o vatahen a akma sia,

“Imo a makaycheh am mayokay ka na. Mayvangon ka, imo a nadiman, tapian torohan naymo ni Cristo so sehdang.”

¹⁵ Dawa makapatak kamo an ango o kaparin no viay nio. Makasolib kamo a dia akma sira so dia makapanmo so mayanong.

¹⁶ Serbien nio o tiempo nio do mapia, takwan no mondo aya am aro itoroh na a panyimotan so oras.

¹⁷ Makasolib kamo as kapanmo nio sia o inolay no Dios do viay nio.

¹⁸ Nawri o paynolayen nio o Espirito a omkontrolado dinio as dia no palek a nia so omraráyaw dinio.

¹⁹ Nawri o kawnonongan nio o mapaypahni so saray no kadwan dinio as kapakanta nio so salmo kano kanta sa a idaday nio so Dios a yapo do soyot no tawol nio,

20 as kapamahemahes nio do Dios Ama do atavo do ngaran no Apo ta a si Jesu Cristo.

*No anongan da no asa vahay
(Colosas 3:18-19; 1 Pedro 3:1,7)*

21 Pamahbohen nio o karakohan nio as kasinchad nio do anohed no kadwan dinio a nia so kavoyan so kanib nio si Cristo.

22 Inio a kakovot a mavavakes am mapamahbo kamo as katoroh nio so anohed do kakovot nio a mahakay a akma so katoroh nio so anohed do Apo ta a si Jesus.

23 Ta no mahakay am mian o anohed na kano anongan na do kakovot na a mavakes a akma so kaparin ni Cristo do karakohan naya a nia so timban a inadidi na.

24 Dawa akma so kasinchad dia no timban o anohed ni Cristo am inio a mavavakes am sincharan nio o anohed no kakovot nio.

25 Inio a kakovot a mahahakay am ichaddaw nio o kakovot nio a akma so kaddaw na **nia** ni Cristo o timban naya as nakatoroh na nia o viay na a omadidi sia,

26 tapian payvadiwen na ya a manamonamo as kavidin na sia pavawahen do pakagatosan a makayamot do Chirin na,

27 tapian risibien na sia a oyod na ipakamia as manamonamo a abo so mancha kano kparoparoan.

28 Dawa mayanong o kaddaw nia no mahakay o kakovot na a mavakes a akma so kawnong kano kaddaw na no romanies na a karakohan. No asa a ka mahakay a maddaw no kakovot na am ichaddaw na o romanies na a karakohan.

²⁹ Arava o mapaychanoanolay sia o karakohan na an dia voken a no kasikaso na sia a akma pa so parinyen ni Cristo do timban na,

³⁰ a nia so karakohan na a tayto ta pachangayan.

³¹ “As do makayamot dia,” akma so nakatolas, “am karoan no asa a ka mahakay o inyapoan na sira as kapachichasa na do kakovot na, takwan asa dana sa vahay anmana karakohan.”

³² Oyod a rakoh o inmonmoan na nia ta ipapanmo na diaten an ango o relasion aya ni Cristo dira do nanganohed sia.

³³ Amna mayinmonmoan pa ya so kapayanong no kaddaw nia no mahakay o kakovot na as katoroh pa no mavakes so anib do kakovot na.

6

No anongen no inyapoan kano kamanganakan (Colosas 3:20-21)

¹ Inio a kamanganakan, anohdan nio sa o inyapoan nio a niaya so yokoyokoran ninio no Apo taya a si Jesus.

² “Torohan mo so anib kano onor o ama mo kano ina mo,” a nia so manoma a mando no Dios a pachirayayan no promisa a makavata sia,

³ “tapijan mayendes o viay mo a maydamnay so aktokto.”

⁴ Inio a inyapoan am makayhawa kamo tapijan abo dinio o pakayapoan no kapachisobna da no kamanganakan nio sa asna no kapayrakorakoh nio sira a paynananawhen kano disiplinahen a omonot do kakeyan nira no Dios.

*No anongan no pachirawatan kano apohen
(Colosas 3:22; 4:1)*

⁵ Inio a mian so apohen am anohdan nio sa a mian so anib as kanawri no chitachitahen nio o kapakamia nio sira a akma so kapayserbi nio di Cristo,

⁶⁻⁷ as moyvoh ava an mian o makavoya dinio a ichakey nio a pakamiahen asna makayamot ta si Cristo o Apohen nio am mayserbi kamo a nia so inolay no Dios dinio. Pawyoren nio o kapatongtong nio sira ya ta niaya o tinongdoan dinio no Dios a trabaho nio

⁸ do kapanmo nio sia o ka no Dios no tomoroh so vahes no atavo a pinarin no mian anmana abo so apohen.

⁹ Inio a apohen am makatanoy kamo dira do pachirawatan nio sa as kapanmohen nio o kapachalit nio dira a mian so Apohen do hanyit a dia mangatatarek.

*No armas sa do kalaban ta do marahet
(Colosas 4:2-4)*

¹⁰ Do pakavosan ko sia am do rakoh a sidong no Apo taya am parinyen nio o inolay no Dios dinio a iya pa so tomoroh so ayet a ichapatongtong nio sia.

¹¹ Serbien nio o armas saya a tinoroh dinio no Dios tapian maparin nio a panghomisan o sistema kano panentasionan ni Satanas,

¹² takwan ara tava machilaban do tawo asna di Satanas kanira no rarayay na a dia voya a mian so ipakapamarin do mondo aya a payserbian da no tawotawo a mian pa do kasarisarian, a sira pa o ompawnot do aran ango a marahet.

13 Dawa serbien nio o armas aya a tinoroh dinio no Dios tapian maparin kamo a manghomis do tentasion as kavidin nio a mahni a maytetnek.

14 Fermi kamo a makahanda do kapavata nio so kakawayoran a nia so akmay tahed a omareglə so onayen no asa ka tawo as kayan no abo so kaparoparoan a dadakay nio a nia so defensa no tawol nio,

15 as kapawnay nio sia o sapatos aya a nia so mapavoya so kahanda nio a tomoroh nia o Evanghelio aya a mapayyidi so tawo do Dios,

16 as kayan no saray nio a mangdet a makaparin sia valaten o omnininyas a pana ni Satanas a nia so akma so rakoh a valat a mian do tanoro no asa ka sinjalo,

17 as kadi nio a maykamadamanan do nakalibri nio a nia so proteksion no aktokto nio do panlokoan ni Satanas, as kapamondan nio do Espada aya no Espirito a nia so Chirin no Dios.

18 Do nakapawnay nio na sira ya am macha-hoahok kamo do Dios a pawnoten no Espirito. Kapakadichayakay nio as kadi nio mabdibdisan so kapachahoahok nira no atavo a tawotawo na,

19-20 as kaniaken pa tapian torohan na yaken no Dios so kasolivan kano angdet ko a mapawnonong so Evanghelio aya a dia pinapanmo kaychowa as tayto a pinainkargado diaken a pawnonongan ko a nia so pakayapoan no ichatayto ko a makalaboso.

*No vidin sa ni Pablo
(Colosas 4:7-8)*

²¹ Tayto ko a tovoyen dinio o kakteh ta a si Tychicus a iya so oyod ko a ichasaray kano ichaddaw a rrayay do trabaho ko do Apo taya, tapian mapanmo nio o kapakaparin ko.

²² Tovoyen ko tapian mapanmo nio o kaparin no viay namen as tapian maypagsal kamo kano maypangdet o tawol nio.

²³ Torohan kamo pa no Dios kano Apo ta a si Jesu Cristo so kaydamnayan no aktokto, addaw kano saray.

²⁴ Bendisionan kamo pa no Dios a atavo a diabdbidis so addaw no Apo taya a si Jesu Cristo as katoroh na pa dinio so grasia na.

**Ivatan
New Testament plus Psalms and Proverbs**

copyright © 2016 Wycliffe Bible Translators, Inc.

Language: Ivatan

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 3 May 2025 from source files
dated 3 May 2025

62508313-bcb1-53b4-b1bd-e4271f5cec34